

**Reman Terhadap Seorang Ahli Perniagaan Berhubung Kes NFC Disambung
Bernama
24 Disember, 2011**

KUALA LUMPUR, 24 Dis (Bernama) -- Reman terhadap seorang ahli perniagaan bagi membantu siasatan berhubung kes dana Pusat Fidlot Nasional (NFC) dan pembelian sebuah kondominium mewah di ibu negara disambung tiga hari bermula Jumaat.

Pesuruhjaya Suruhanjaya Pencegahan Rasuah Malaysia (SPRM) Datuk Mustafar Ali berkata lelaki berumur 45 tahun itu pada mulanya ditahan reman dua hari lepas.

"Lelaki itu disambung reman bagi melengkapkan dan membantu siasatan kes itu di bawah Akta SPRM 2009," katanya kepada Bernama ketika dihubungi.

Isu mengenai NFC itu berbangkit ekoran Laporan Ketua Audit Negara 2010 Oktober lepas yang menyatakan NFC gagal memenuhi matlamat penubuhannya manakala pembangkang pula mendakwa berlaku penyelewengan dalam pengurusan dananya.

Sementara itu, pengerusi NFC Datuk Seri Mohamad Salleh Ismail dalam satu kenyataan hari ini berkata ahli perniagaan tersebut tidak mempunyai kaitan dengan beliau atau anggota keluarganya.

Katanya, individu itu juga tidak pernah berkhidmat dengan NFC.

---BERNAMA

Hakcipta © 2011 BERNAMA

Source: <http://www.bernama.com/bernama/v5/bm/newsindex.php?id=636397>